



16 Desember 2022
1 Yohanes 4: 10



Dibata kekelengen



Lit sekalak bulang ngasuhi 2 ekor manuk I kesain rumahna. Sada paksa, bulang e ngidah maka duana manukna ndai sitaguten. Emaka la atena manukna e luka, maka igurbana gelah banci sirang tapi tetap saja manuk e sitaguten denga. Adi benter alu batu, mbiar ka ia luka manukna. Emaka deherina manukna ndai ras erupaya guna nirangkensa...tapi kai si jadi, salah sada manuk ndai nagut tan bulang ndai. Alu jungut-jungut, ia ngerana: 'kai lah ate manuk e pe...kerina nggo ibahan guna mpesirangsa ia tapi la ia nggit...la kin tehna adi pediat bage duana nge kari cilaka...bicara min jadi manuk aku ndai tentu banci kupesirang ia duana...

Tentu siakap si lang-lang cerita e: labo lit kalak nggit jadi manuk guna mpesirang manuk si rubat e.. tapi timai lebe,,adi siakap cerita ndai labo mungkin terjadi tapi adi sinehen ibas nas renungenta sendah maka Dibata si nusur ku doni ibas rupa manusia. Adi Dibata nusur ku doni ibas rupa manusia e ertina ia nadingken kenyamananna I surga menuju ketidaknyamanan gelu I doni. Si jadi penungkunen eme: engkai maka ilakokenNa bage? erkiteken kekelengenNa man banta. Labo kita si enggo engkelengi Dibata, tapi Ia nge si ngkelengi kita. Adi si cek ibas Padan siNdekah maka kenca manusia itepa Dibata, Dibata nggo ngelakoken kerinana man manusia gelah tetap ibas dalam keselamatan tapi si terjadi eme manusia menyimpang! La sedarina maka kai si enggo ilakoken manusia eme sada tindakan si erbanca kegeluhenna cilaka. Nggo mbue kalak ipake Tuhan jadi perkakasNa guna nehken KataNa ras sura-suraNa...tapi la ndekahsa minter ka nge mulihken ku dalam si jahat. "Kai nari nge si arus kulakoken guna kam? Guna ngatakensa maka kai si kulakoken enda eme erkiteken keleng teKu kam.." mungkin Dibata rukur bage....janah rempet:..."enggo kueteh...adi selama enda suru-suruhanku la ibegi...maka gundari Aku saja si nusur ku doni guna ngelakoken misi penyelamatan man bandu..." E me kekelengen Dibata si icidakenNa man banta guna gelah sieteh uga luar biasana kekelengenNa man banta gelah kita iperdameken ras Ia bagepe dosa-dosanta ialemi. Berita si meriah man banta si nungkun denga lalap," payo nge keleng ate Dibata aku?" Jabapna, "Ue, keleng ate Dibata kita kerina". Enggo ibuktikenNa alu reh ku doni enda ibas rupa manusia. Enggo icidahken Tuhan kekelengenNa banta! Uga kita ncidahken pengatakan bujurta manb Dibata ibas paksa gundari enda?

Dia mengasihi bukan karena kita layak untuk dikasihi tetapi karena Dia adalah Kasih. (C.S Lewis)

